



Na osnovu člana 15. Zakona o Upravi za indirektno oporezivanje („Službeni glasnik Bosne i Hercegovine“ broj: 89/05), direktor Uprave za indirektno oporezivanje, d o n o s i

INSTRUKCIJU
o nadležnosti organizacionih jedinica Sektora za poreze
za provedbu Zakona o akcizama u Bosni i Hercegovini i
Pravilnika o primjeni Zakona o akcizama u Bosni i Hercegovini

Član 1.
(Predmet)

Ovom Instrukcijom se regulira nadležnost organizacionih jedinica Sektora za poreze za provedbu postupaka koji se odnose na primjenu Zakona o akcizama u Bosni i Hercegovini („Službeni glasnik BiH“, broj: 49/09) (u daljnjem tekstu: Zakon) i Pravilnika o primjeni Zakona o akcizama u Bosni i Hercegovini („Službeni glasnik BiH“, broj: 50/09) (u daljnjem tekstu: Pravilnika), iz djelokruga rada ovog Sektora.

Član 2.
(Registracija poreznog obveznika)

- (1) Zahtjev za registraciju poreznog obveznika u smislu odredbe člana 13. Zakona, podnosi se nadležnom Regionalnom centru, Odsjeku za poreze-Grupi za pružanje usluga poreznim obveznicima, koja u skladu s važećim propisima, obrađuje predmetni zahtjev i dostavlja ga u Središnji ured, Sektoru za poreze-Odsjeku za pružanje usluga poreznim obveznicima.
- (2) Nakon prijema zahtjeva, Odsjek za pružanje usluga poreznim obveznicima provodi postupak i donosi odluku o upisu u Jedinstveni registar obveznika indirektnih poreza.

Član 3.
(Prijava proizvodnog pogona i skladišta)

- (1) Prijava proizvodnih pogona u smislu odredbe člana 14. Zakona i člana 14. Pravilnika, podnosi se najmanje 15 dana prije početka korištenja, Regionalnom centru nadležnom prema sjedištu poreznog obveznika, Odsjeku za poreze-Grupi za pružanje usluga poreznim obveznicima, koja u skladu s važećim propisima evidentira prijavu u odgovarajućoj aplikaciji informacionog sistema.
- (2) Prijava skladišta u smislu odredbe člana 14. Zakona i 14. Pravilnika, podnosi se Regionalnom centru nadležnom prema sjedištu poreznog obveznika, Odsjeku za poreze-Grupi za pružanje usluga poreznim obveznicima, koja u skladu s važećim propisima evidentira prijavu u odgovarajućoj aplikaciji informacionog sistema.

Član 4. (Prijava akcize)

- (1) Prijava o obračunatoj domaćoj akcizi (obrazac PDA) u smislu odredbe člana 27. Zakona i člana 34. Pravilnika, podnosi se Regionalnom centru nadležnom prema sjedištu poreznog obveznika, Odsjeku za poreze-Grupi za obradu poreznih prijava.
- (2) Po prijemu prijave iz stava (1) ovog člana, Grupa za obradu poreznih prijava je dužna da podatke iz prijave unese u odgovarajuću aplikaciju informacionog sistema.
- (3) Ukoliko prijava iz stava (1) ovog člana nije podnesena i evidentirana do 25. u mjesecu, izvršit će se razrez po službenoj dužnosti.

Član 5. (Evidencija TEF obrazaca)

- (1) Primjerak TEF obrasca, koji se shodno članu 42. stav (2) Pravilnika dostavlja UIO, podnosi se Regionalnom centru Sarajevo, Odsjeku za poreze-Grupi za pružanje usluga poreznim obveznicima.
- (2) Obrazac iz stava (1) ovog člana, ukoliko je s tim suglasan šef Grupe za pružanje usluga poreznim obveznicima, može se dostavljati elektronskim putem.

Član 6. (Povrat akcize plaćene na ulje za loženje)

- (1) Zahtjev za priznavanje prava na utvrđivanje ukupne količine na koju se može ostvariti pravo na povrat akcize na ulje na loženje u toku jedne kalendarske godine (PPLO) u smislu odredbe člana 48. Pravilnika, podnosi se Regionalnom centru nadležnom prema sjedištu ili adresi podnosioca zahtjeva, Odsjeku za poreze-Grupi za pružanje usluga poreznim obveznicima, koja u skladu s važećim propisima, provodi postupak i ukoliko su ispunjeni uvjeti, donosi u roku od 30 dana od dana podnošenja zahtjeva, rješenje o odobrenoj količini.
- (2) Rješenje iz stava (1) ovog člana, kojim je odobrena ukupna količina ulja za loženje na koju se može ostvariti pravo na povrat akcize, unosi se u odgovarajuću aplikaciju informacionog sistema.
- (3) Povrat plaćene akcize na ulje za loženje, vrši se na osnovu pojedinačnog zahtjeva iz člana 49. Pravilnika (obrazac ZPLO), koji se podnosi Regionalnom centru nadležnom prema sjedištu ili adresi podnosioca zahtjeva, Odsjeku za poreze-Grupi za pružanje usluga poreznim obveznicima, koja u skladu s važećim propisima, provodi postupak i ukoliko su ispunjeni uvjeti, a nakon poravnanja drugih obaveza podnosioca zahtjeva, u roku od 30 dana od dana podnošenja zahtjeva, donosi rješenje o povratu akcize.
- (4) Pravo na povrat akcize može ostvariti samo do količine odobrene rješenjem iz stava (1) ovog člana.
- (5) Odsjek za poreze nadležnog Regionalnog centra-Grupa za pružanje usluga poreznim obveznicima, rješenje iz stava (3) ovog člana, unosi u odgovarajuću aplikaciju informacionog sistema i vrši razduženje količine ulja za loženje odobrene rješenjem iz stava (1) ovog člana.
- (6) Jedan primjerak izvršnog rješenja iz stava (3) ovog člana, dostavlja se Sektoru za poslovne usluge na daljnje postupanje.

Član 7. (Povrat akcize plaćene na alkohol i etil alkohol)

- (1) Zahtjev za povrat plaćene akcize na alkohol i etil alkohol u smislu člana 50. stav (3) Pravilnika, podnosi se Regionalnom centru nadležnom prema sjedištu podnosioca zahtjeva, Odsjeku za poreze-Grupi za pružanje usluga poreznim obveznicima, koja u skladu s važećim propisima, provodi postupak i ukoliko su ispunjeni uvjeti, a nakon poravnanja drugih obaveza podnosioca zahtjeva, donosi rješenje o povratu akcize.
- (2) Odsjek za poreze-Grupa za pružanje usluga poreznim obveznicima, rješenje iz stava (1) ovog člana, unosi u odgovarajuću aplikaciju informacionog sistema, u koju se pored podataka o podnosiocu zahtjeva i količini alkohola i /ili etil-alkohola za koji je odobren povrat, evidentiraju i podaci o priloženim dokazima iz člana 50. stav (3) Pravilnika.

- (3) Jedan primjerak izvršnog rješenja iz stava (1) ovog člana, dostavlja se Sektoru za poslovne usluge, na daljnje postupanje.

Član 8.

(Povrat akcize plaćene na proizvode koji su izvezeni)

- (1) Zahtjev za povrat akcize plaćene u smislu člana 51. Pravilnika, na proizvode koji su izvezeni, podnosi se Regionalnom centru nadležnom prema sjedištu podnosioca zahtjeva, Odsjeku za poreze-Grupi za reviziju i kontrolu ili Grupi za kontrolu velikih poreznih obveznika, ovisno o kojem se obvezniku radi, koja grupa u skladu s važećim propisima, provodi postupak i ukoliko su ispunjeni uvjeti, a nakon poravnanja drugih obaveza podnosioca zahtjeva, donosi rješenje o povratu akcize.
- (2) Jedan primjerak izvršnog rješenja iz stava (1) ovog člana, dostavlja se Sektoru za poslovne usluge, na daljnje postupanje.

Član 9.

(Registracija skladišta ulja za loženje)

- (1) Zahtjev za registraciju skladišta ulja za loženje (obrazac RSUL) u smislu člana 56. Pravilnika, podnosi se Regionalnom centru nadležnom prema sjedištu podnosioca zahtjeva, Odsjeku za poreze-Grupi za pružanje usluga poreznim obveznicima, koja u skladu s važećim propisima obrađuje predmetni zahtjev o registraciji skladišta i ukoliko su ispunjeni uvjeti, izdaje uvjerenje o registraciji, te držaoca skladišta i skladište evidentira u odgovarajućoj aplikaciji informacionog sistema.
- (2) Ukoliko uvjeti za registraciju skladišta nisu ispunjeni, nadležna organizaciona jedinica rješava predmetni zahtjev u skladu s pravilima upravnog postupka.

Član 10.

(Evidencija o prometu ulja za loženje)

- (1) Evidencija o prometu ulja za loženje propisane odredbom u smislu člana 57. Pravilnika (IKUL obrazac), dostavlja se Regionalnom centru nadležnom prema sjedištu poreznog obveznika, Odsjeku za poreze-Grupi za pružanje usluga poreznim obveznicima.
- (2) Po prijemu evidencije iz stava (1) ovog člana, Grupa za pružanje usluga istu evidentira u odgovarajuću aplikaciju informacionog sistema.

Član 11.

(Obračun i naplata akcize na ulje za loženje)

- (1) Radnje po zapisnicima ovlaštenih službenih lica nadležnih organa entiteta i Brčko Distrikta Bosne i Hercegovine, o utvrđenim nepravilnostima koje imaju za posljedicu naplatu akcize u smislu člana 58. Pravilnika, preduzimat će Odsjek za poreze-Grupa za reviziju i kontrolu ili Grupa za kontrolu velikih poreznih obveznika, ovisno o kojem se obvezniku radi, Regionalnog centra nadležnog prema sjedištu poreznog obveznika ili adresi lica kod kojeg su utvrđene nepravilnosti, koja grupa u skladu s važećim propisima, provodi postupak obračuna i naplate akcize u smislu odredbe člana 34. stav (2) Zakona.

Član 12.

(Evidencija o putarini)

- (1) Evidencija o oslobađanju putarine pri uvozu dizel goriva iz člana 61. Pravilnika (PUT-II), oslobađanju putarine pri nabavkama u domaćem prometu iz člana 62. Pravilnika (PUT-III) i mjesečni izvještaj o nabavkama dizel goriva iz člana 63. Pravilnika (PUT-IV), dostavlja se Sektoru za poreze, Odsjeku za kontrolu velikih poreznih obveznika.

- (2) Po prijemu evidencije iz stava (1) ovog člana, Odsjek za kontrolu velikih poreznih obveznika, istu evidentira u odgovarajuću aplikaciju informacionog sistema, te vrši poređenje podataka iz evidencija s količinom odobrenom od strane Upravnog odbora UIO.
- (3) Ukoliko Odsjek za kontrolu velikih poreznih obveznika, utvrdi odstupanja u pogledu oslobađanja putarine, uputit će inicijativu nadležnom Regionalnom centru, Odsjeku za poreze-Grupi za reviziju i kontrolu ili Grupi za kontrolu velikih poreznih obveznika, ovisno o kojem se obvezniku radi, da se izvrši kontrola korisnika i eventualni obračun i naplata putarine.

Član 13.
(Ostali zahtjevi)

- (1) Zahtjevi za provedbi postupaka iz nadležnosti Sektora za poreze, a koji se odnose na postupke vezane za akcizu i putarinu, za koje nije prethodnim članovima ove Instrukcije određena nadležnost, zaprimat će se i rješavati u Regionalnom centru nadležnom prema sjedištu poreznog obveznika, Odsjeku za poreze-Grupi za pružanje usluga poreznim obveznicima.
- (2) Zahtjevi za provedbu postupaka iz nadležnosti Sektora za poreze koji se odnose na postupke vezane za akcizu i putarinu prema ranije važećim propisima, a podneseni su nakon stupanja na snagu Zakona, zaprimat će se i rješavati u organizacionim jedinicama koje su bile nadležne za rješavanje takvih zahtjeva u vrijeme važenja tih propisa.

Član 14.
(Rješavanje po žalbi)

- (1) Na odluke donesene od strane Grupe za pružanje usluga poreznim obveznicima, Grupe za reviziju i kontrolu ili Grupe za obradu poreznih prijava, prvostepenu odluku po žalbi izjavljenoj u skladu sa članom 138. Zakona o postupku indirektnog oporezivanja, donosi šef Odsjeka za poreze nadležnog Regionalnog centra.
- (2) Na odluke donesene od strane Grupe za kontrolu velikih poreznih obveznika, prvostepenu, odluku po žalbi izjavljenoj u skladu sa članom 138. Zakona o postupku indirektnog oporezivanja, donosi šef Grupe za kontrolu velikih poreznih obveznika.

Član 15.
(Stupanje na snagu)

Ova Instrukcija stupa na snagu narednog dana od dana objave u „Službenom glasniku BiH“.

Broj: 02-2-2656-1/09
Datum: 02.12.2009. godine

DIREKTOR
Kemal Čaušević